

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoma chuan vawiin khan Mizoram leh Manipur inrinaa Tuivai Lei a hawng a, a hmingah inunauna lei, ‘Unity Bridge’ a vuah.
- 2. Larsap Gen (Rtd.) VK Singh chuan Kolasib District chhunga National Highway thawmthat hna kal muang chuan mipuite harsatna nasa takin a thlen a ni, a ti.
- 3. Prime Minister Narendra Modia chuan vawiin khan Pradhan Mantri Kisan Samman Nidhi (PM-KISAN) scheme instalment 19-na cheng vaibelchhe sing 2 leh sang 2 a pe chhuak
- 4. Prime Minister Narendra Modi chuan naktuk Pathianni chawhma dar 11 hian 'Mann Ki Baat' programme a hmang leh dawn.

<><><>

TUIVAI BRIDGE

Chief Minister Pu Lalduhoma chuan vawiin khan Mizoram leh Manipur inrinaa Tuivai Lei a hawng a, a hmingah inunauna lei, ‘Unity Bridge’ a vuah.

He hunah hian thu sawiin Chief Minister chuan he kawngpui hi Mizoram leh Manipur inkalpawhna kawng pawimawh ber a ni thin a ti a, Inter State Bus te pawh tlantir a ni a, lei hi tuilianin a lak leh mai thin avangin kum 1999 khan meter 6 lain an tisang a. Hma an lak mek lai hian Seling to Tipaimukh road chu National Highway atana puan a ni a. MoRTH lamin permanent-a dawh tumin hma an la mek tih hre chungin, sum leh pai seng lutuk lo va, Bailey Bridge part hlui te fawm khawm a, hun engemaw chen atana hman theih tur Bailey Bridge dawh an rilruk ta a ni a ti. Hna an thawh tan lai nikum May ni 9 khan amah ngeiin a hmun hi a tlawh thu leh hmanraw thar hmanga dawh zawk turin PWD Engineer te a hrilh thu a sawi a. Chief Minister chuan he lei dawh hna hi hmanhmawhthlak bik leh pawimawh bika an ngaih avangin chak takin an bawhzui a, kum khat pawh a ral hmian an dawh zo va, tun thla ni 2 khan uluk takin an enchhin a, tha tawkah an ngai tih a sawi.

(BYTE)

Chief Minister chuan Kawngpui tha pahnih a lo awm dawn ta chu thaw a veng huai tih a sawi a. He lei chhawr phak mipuite a lawmpui thu leh Manipura unau harsatna tuar mekte puala theihtawp chhuaha an dawh a nih avangin Inunauna Lei (Unity Bridge) tiin a hming a vuah thu a sawi a ni.

He lei sei zawng hi meter 200 a ni a, a lawn kaina lei meter 50 nei, a vaia meter 250 a sei, metric ton 30 dawl zo tura dawh a ni a. Tlo leh him taka a awm theih nan metric ton 20 chin chauh zawhtir an phal dawn thung a ni.

<><><>

GOVERNOR

Mizoram Larsap Gen (Rtd.) VK Singh chuan Kolasib District chhunga National Highway thawmthat hna kal muang chuan mipuite harsatna nasa takin a thlen a ni, a ti.

Vawiina Kolasib DC Conference Hall-ah Sawrkar Department hotute, khawtlang leh tlawmngai pawl hruaitute a kawmnaah he thu hi sawiin Larsap chuan NHIDCL hnuaia Four Lane kawng laih turah compensation leh forest clearance chungchangahte harsatna tamtak sutkian a nih tawh a ti a. Hna thawh theih hun chhung a tlem avangin NHIDCL hotute chu a rang thei ang bera chak taka hma la turin a hrilh a. Harsatna a awm a nih pawhin amah hrilhhre zel tur leh puih a inhuam reng thu a hrilh a ni.

Larsap chuan Kolasib District chu Mizoram luhka leh chak lakna pawimawh tak a nih avangin Larsap a nih hnua tlawh hmasak bera a neih thu a sawi a. Dan leh thupek kenkawh kawngah thawktu indaihlo chung a enforcement agency te'n theihtawp an chhuah thin chu lawmawm a tih thu a sawi a. Thalaite nun tibuaia ram tana hmelma lian tak ni mek ruihhlo do kawngah tanlak lehzual a tul a, ruihhlo tawlhruk eng emawzat man ni mahse, man loha kal tlang pawh a awm nual avangin hemi kawngah hian a huhova tanrual a tul a ni, a ti.

Larsap hian vawiin vek khan Vairengte-a Counter-Insurgency and Jungle Warfare School (CIJWS) a tlawh a.

He hunah hian CIJWS Commandant Maj Gen VK Nambiar chuan CIJWS kalphung leh sipai hnen a zirtirna an pek dan tlangpuite a sawifiah a, sipaite'n indo nunchan an entir bawk.

Governor hian CIJWS Campus Lailapur pawh a tlawh bawk.

<><><>

GHC

Champhai tlawha zin mek Gauhati High Court Judge, Justice Pi Marli Vankung chuan vawiin khan Champhai Dinthar Venga Judicial Quarters sakna tur hmunhma leh Champhai Vengsanga District Court Building thar sak mek te a tlawh.

He hunah hian District & Sessions Judge Pu Liansangzuala chuan Champhai Judicial District dinhmun sawiin District & Sessions Judge hovin Civil Judge Sr. Division (Chief Judicial Magistrate) 1 leh Civil Judge Jr. Division (Judicial Magistrate First Class) 1 ten an thutchilh mek thu a sawi a. Judge Post 7 ruahman atangin post ruak pali a awm mek thu leh, supporting staff post 23 awmah post 13 hnawhkhawh tawh a nih thu sawiin post 10 a la ruah mek thu a sawi a ni.

Champhai District Court hian December 2024 leh January 2025 chhung khan Case 241 an chingfel a. Tun dinhmunah Case kal lai mek 647 a awm a, heng zinga Case 344 chu ND&PS Act kaihhnawih a ni.

District Court a tlawh hnu hian Champhai Bawrhsap Pu VL Remliana hovin, SP Pu Shivendu Bhushan, Excise & Narcotics Asst. Commissioner Pu C Thangchuanga leh DCPO Pi R. Lalrinchhani te nen Champhai District chhunga dan leh thupek kenkawh dan te leh naupang venhimna chungchang te an sawiho a ni.

Pi Marli Vankung hian Khawzawl District Court leh Judicial Quarters sakna tur hmunhma Khawzawl Darngawn Venga mi chu a tlawh bawk a ni.

<><><>

CM

Vawiin hi Chief Minister Pu Lalduhoma piancham a ni a, Chief Minister kum 76 tlin lawmna pual hian Prime Minister Narendra Modi leh ramchhunga hruaitu hrang hrangten piancham chibai an buk a ni.

Prime Minister Narendra Modi chuan “X” kaltlangin Pu Lalduhoma piancham chibai hi a buk a, hrisel leh dam taka hun hmang chhunzawm zel turin duhsakna a hlan a ni. Union Home Minister Amit Shah pawhin Pu Lalduhoma hi piancham chibai a buk a, mipuite tana tha taka hna a thawh zel theih nan duhsakna a hlan a ni.

Minister of Road Transport & Highways Pu Nitin Gadkari pawhin Pu Lalduhoma piancham lawmpuinan “X” kaltlangin a sawi a, Minister of Ports, Shipping & Waterways Sarbananda Sonowal leh Parliamentary Affairs Minister Kiren Rijiju pawhin piancham chibai an buk bawk a ni.

Pu Lalduhoma hi thenawm state Assam leh Arunachal Pradesh Chief Minister te pawhin piancham chibai an buk a, Mizorama tana a hnathawh te chu chhuanawm antih thu leh mipui tana thawk chhunzawm thei tura hriselna nei zel turin duhsakna an hlan a ni.

Pu Lalduhoma hi kum 1949 February ni 22 khan Tualpui khua ah a piang a, kum 1977 khan Indian Police Service ah inziak tlingin kum 1984 thleng he hna hi a thawk a, heta tang hian ram tana ke pen tanin Mizoramin remna leh muanna a neih theih nan theihtawp a chhuah a, MP te niin MLA ah pawh vawi tam tak thlan tlin alo ni tawh a, kum 2023 inthlanah ZPM chuan sawrkarna siamin hetah hian Pu Lalduhoma chu Mizoram Chief Minister 6-na ni turin December ni 8, 2023 khan rinawmna thu tiam tira lakluh a ni.

<><><>

CBC

Central Bureau of Communication Aizawl Field Office te chuan vawiin khan Mamit district chhunga Nghalchawm khuaah Viksit Bharat Special Outreach Programme an buatsaih.

He huna khuallian Nghalchawm Village Council President Pu F. Lalbiaktluanga chuan India ram sorkar chu mi zawng zawng huapzo hmasawmna thlentu a nih avanga a fak thu sawiin ourtreach programme pawh a hlawkpui thu a sawi a. Khaw mipuite chu rilru inhawng taka sorkar laipui hmasawmna hnathawh hrang hrangte hmang tangkai turin a chah a ni.

He hunah hian CBC Aizawl in-charge Pu Lalginlen Lhouvum chuan an hnathawh hrang hrang mipuite a hrilhfhiah a. Nghalchawm YMA President Pu C. Malsawmsanga chuan he inzirtirna hmanga sorkar laipui hnathawh tha tak tak te mipuiten an lo hrefiah thar chu lawmawm a tih thu a sawi a. He huna resource person Nghalchawm UPS zirtirtu Pu H. Laldingluaia chuan sorkar laipui scheme hrang hrang mipuite a hrilhfhiah bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM KISAN

Prime Minister Narendra Modia chuan vawiin khan Pradhan Mantri Kisan Samman Nidhi (PM-KISAN) scheme instalment 19-na cheng vaibelchhe sing 2 leh sang 2 a pe chhuak. He scheme hi loneitu vaibelchhe 9.8 chuangin an dawng dawn a. Loneitu mi pakhat zelah cheng sang ruk kum khat chhungin pek an ni ang. Union Agriculture and Farmers Welfare Minister Shivraj Singh Chauhan chuan vawiin hi sawrkar laipui leh state sawrkarin scheme a siam hrang hragnte mipuiten an hriat tharna ni anih thu a sawi a. Direct Benifit Transfer hmangin loneitu vaibelchhe 9 chuang hnenah cheng veibelchhe sing 2 leh sang 2 hi semral a ni ang a ti a. Loneitute hamthatna chu sawrkar ngaihpaawimawh hmasa ber a ni a ti a. PM-KISAN scheme hnuaiah hian loneitu chhungkaw vaibelchhe 11 chuang hnenah cheng vaibelchhe nuai 3 sing 4 leh sang 6 chuang semral a ni tawh a ti bawk.

<><><>

UNION HEALTH MINISTER

Mauritius National Day vawi 57-naah Prime Minister Narendra Modia chu Guest of Honour a ni dawn. Parliament ah hemi chungchang hi puangin Mauritius Prime Minister Navin Ramgoolam chuan Mauritius tana hun ropui tak anih tur thu a sawi a. Prime Minister Narendra Modia an lo mikhual thei tur chu ram pahnih inkara inlaichinna tha leh nghet tak lantirna anih thu a sawi a ni.

<><><>

PM MANN KI BAAT

Prime Minister Narendra Modi chuan naktuk Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 119-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>